



TĀ MĀTOU I RONGO AI

HE WHAKARĀPOPOTOTANGA
O NGĀ WHAKAHOKINGA
WHAKAARO MŌ TE WHAKAHAERE
I TE TĀMATEMATE O TE KAURI





I waenga i te 25 o Hune me te 16 o Hūrae i te tau 2018, nā te Rōpū Whakahaere i te Tāmatemate o te Kauri¹ i tuku karanga ki te iwi whānui kia tāpaetia he whakaaro hei ārahi i te whakahaere i te tāmatemate o te kauri ā ngā tau e tū mai nei. I tae mai ki a mātou neke atu i te 80 maramara urupare i āta tuhia, neke atu hoki i ngā kauwhau ā-waha 500 mai i ngā hui mō te iwi whānui puta noa i ngā takiwā e tupuria ana e te kauri.

Tērā ētahi tāhuhu kua puta i ngā whakaaro i whakahokia mai. Nā konei kua whai māramatanga matawhānui mātou ka whakamahia hei tāmata i te rautaki o Aotearoa mō te whakahaere i te tāmatemate o te kauri.

¹ Ko tēnei kaupapa he mahi kāhui i waenga i Biosecurity New Zealand (he wāhanga nō roto i te Manatū Ahu Matua), Te Papa Atawhai, Te Kaunihera o Tāmaki-makaurau, te Kaunihera ā-Rohe o Waikato, te Kaunihera ā-Rohe o Te Tai Tokerau, Toi Moana, Te Roroa (tangata whenua o te ngahere o Waipoua), me Tangata Whenua Roopu (tētahi rōpū torowhānui mō ngā iwi/hapū whai pānga ki ngā whenua e tupuria nei e te kauri).

TE TITIRO MATAWHĀNUI KI TE KAUPAPA

Tā koutou ki a mātou:

- Ko tēnei mea te tāmātemate o te kauri he raruraru matatini, he ohore tōna toronga mai, engari me kimi rongoā mō ngā tau maha kei mua. He tini anō ngā reo kōrero i āwangawanga mō te huringa o te huarere, mō te hauora whānui hoki o te ngahere, ā, he tini anō i kaha rawa te kōrero mō te hāpai tikanga mō te tāmātemate o te kauri kia uru mai he whakaaro whānui kē atu, matawhānui tonu hoki mō te pūtake ake o tēnei mea te tāmātemate, me ngā rongoā, kaupare hoki e tika ana.
- He tini i kī mai ki a mātou me tahuri wawe tātou ki te tiaki i te kauri. Kei te hiahia rātou kia whai wāhi rātou ki roto i ngā mahi, ā, i te kakapa te manawa o te tini mō te korenga e whakarewaina he tikanga ārai i te tāmātemate o te kauri ināia tonu nei.
- Ko te tika o te whakahaere i ngā ngahere kauri te āwangawanga tino nui ki ngā tāngata katoa o te motu. Kāore i kitea he huarahi kotahi, nā te katoa i tautoko, mō te whakahaere ngahere kauri. Ko te tika o ngā whakatau, tae atu ki ngā whakaaro mō te āhua o te whakahaere i ngā ngahere, te whakawhanake i ngā kawa whakahaere ōrite mō te hunga whakamahi whenua, hei tauira, ko ngā tūranga horoi i ngā ara hīkoi, te mea nui mō te tini.
- He tini anō ngā tāngata me whai wāhi ki te tāmātemate o te kauri – mai i ngā hapū/whānau me ngā rōpū hapori, ki ngā kaunihera me te kāwanatanga nui tonu. I kī mai ngā kaikōrero ki a mātou me whakauru e mātou ēnei tāngata, rōpū katoa hoki ki ngā huarahi ka whāia, me tiri whānui ngā mōhiotanga hōu o te wā, ā, me hoatu hoki he reo ki a rātou ina whakatau tikanga mātou mō ngā huarahi whawhai ki te mate nei. I puta te hiahia o ngā hapori ā-takiwā, me ngā rangatira o mea kāinga, o mea kāinga ki te whawhai ki te mate nei.
- Me paihere kia haere ngātahi tonu ngā pūtaiao o te ao hauāuru me te mātauranga Māori, me kore e huraina he mātauranga hōu mō te tāmātemate o te kauri. Kia pai ake tā mātou whakawhitiwhiti kōrero me ngā tāngata katoa, kia kaha tā mātou hoatu i te mātauranga pūtaiao ki ngā rongoā i te ao kikokiko, waihoki me tahuri mātou ki te whakamahi i te mātauranga Māori, kia uru mai ai te katoa ki roto. He rite tonu te hira o ngā pūtaiao pāpori, whanonga hoki ki ngā pūtaiao 'matā koi' nei.

- He nui ngā mahi papai kei te haere, he tini ngā whakaaro aumihi ki te hunga mahi i ngā mahi, he nui hoki ngā ngākau aroha e hiahia ana ki te takoha ki te kaupapa tautiaki i te kauri. E tika ana kia whāwhātia kia whakamahia hoki ēnei tū huarahi katoa, ahakoa taha tangata, ahakoa taha pūtea, me kore e pakari ake ngā tira mahi, i te pae o te pakanga. Me anga atu te rōpū ka whakamanaia hei matakahi mō ngā kōkiri katoa ki te tāmātemate o te kauri ki ēnei huarahi āwhina, hei whakakotahi i ngā hapori tāngata, hapori whakaaro hoki, mō te kauri anō te painga.
- Inā rā ētahi o ngā huarahi, kia whakawhānuitia kia whāngaia hoki ngā akoranga whakangungu i te iwi nui tonu mō te tāmātemate o te kauri tae atu ki ētahi mōhiotanga mō ngā pūtaiao, mō te mātauranga Māori, mō ngā ngahere kua pāngia, mō te mātai ā-rererangi i ngā ngahere, ngā whāinga wāhi takoha pūtea, me ngā mahi i te pae tonu o te whawhai.
- He mea tino nui te akoranga me te whakapiringa ki ngā kāinga, ki ngā takiwā, me noho hoki tēnā hapori, tēnā hapori hei mana mō te kaupapa me te aronga tino pakari ki te hapori i te pūtahī. Nā koutou i kī mai ki a mātou me whakamahi ngā mea ka ākona e mātou, mā koutou hoki e hanga rauemi ka taea te whakamahi e te tangata hei tiri i tō rātou mōhiotanga. Me tuitui hapori kakama ki te ako, kia noho hoki te mātauranga Māori, ngā pūtaiao 'matā koi', me ngā rongoā kikokiko i roto i ngā akoranga.



NGĀ WHAKAHOKINGA WHAKAARO KI NGĀ PĀTAI KI NGĀ HUIHUINGA

He aha ngā āhuatanga kua tino puta mai he hua?

Āe, i rongu mātou i te tini o koutou i kī mai, he pai tonu pea ngā pāhotanga o ngā marama tata nei mō te tāmātemate o te kauri, inā hoki, kātahi anō te ao katoa ka tino aro atu ki te mate nei. E ai ki te titiro tērā ētahi rōpū motuhake i āta mahi tahi ki ngā hapori hei tautohu i ngā huarahi. He mea hoki i tino paingia ngā whakahōutanga ara hīkoi, te hanganga o ngā tūranga horoi hōu i te ngahere, tae atu ki ngā pukapuka whakaako i te iwi nui tonu, otirā ko ngā mea mō ngā kura i tino paingia. I tautokona hoki te whakaaro kia rapua he ingoa, he tohu hōu rānei mō te motu katoa mō ngā kōkiri puta noa i ngā tira katoa e pakanga nei ki tēnei mate, me te tō mai hoki i ētahi atu rōpū hei hoa i roto i ngā wāhanga e tika ana.

He aha ngā tikanga hei whakarerekē hei tautiaki i te kauri?

He mea nui te whāngainga pūtea - kia nui kē atu, kia auau tonu te whakapuare i te kakī o te pūtea, me te mōhio, me āta tuhi he aha i pau atu, kia tika te takoto, kia pūhia e te hau kia whitikia e te rā kia kōrerotia e te iwi. He maha ngā tāngata i tautohu i te pūtaiao (tae atu ki te pūtaiao whanonga, pāpori hoki) hei aronga matua mō te whāngai moni atu, ā, he tini i kī, he mea hira te whāngai i te taha mātauranga Māori ki te pūtea. Tērā anō hoki ngā tāngata i kī me hoatu anō ētahi atu moni ki ngā mahi kīkōkiko (pēnei i ngā whakatikatika ara hīkoi, kia whakapuaretia horotia anō ki ngā tāngata katoa), me takoto hoki he pūtea mō te whakapipiri atu ki ngā kāinga me ngā hapori, me ngā mahi kei te kawea e ngā hapori i runga i te aroha.

Ko ngā kaikawe i te mate - te tangata, te poaka, te tini kīrearea tonu - me te whakahaere i ēnei mea katoa, te take i tino nui te kōrero. He kōrero i rangona whānuitia te ārai i ngā kīrearea i ngā takiwā kauri katoa. I tahuri te tini ki te whakawhānui i te puna tangata e kōrero nei mātou, ā, i uru katoa mai ngā karapu hīkoi, ngā kaimahi ahuwhehua me ētahi atu tāngata e mahi nei ki te ngahere, i roto hoki i te ngahere, arā, ki te kauri. Ko te whakaaro whānui tērā tonu te huhua o ngā tāngata whai mātauranga nui kei ngā ngahere nei e noho ana, e mahi ana, e mōhio ana ki ngā tini putanga kētanga katoa o tō rātou takiwā. Koia i kī mai te tangata me whakatata atu ki ngā iwi me ngā hapū, kia kaha ake te piri atu kia ōrite tonu te piri, kia rangona katoatia hoki ngā reo e tika ana. Ēnei mea katoa, kia puāwai ngā taonga nui, hōhonu kei ngā kete mātauranga Māori e pūranga ana.

Waihoki te kī ā ētahi me whakapiki te whakawhitiwhiti whakaaro mō te kaupapa. Hei kupu whakamutunga, i puta te whakaaro kua huri tuarā ngā kaihautū i te kaupapa ki ngā kaipupuru whenua, ki ngā kaipāmu, ā, he tini i te tino hīkaka katoa kia tiakina ō rātou uru kauri tāmatemate-kore, engari he ruarua noa ngā āwhina mō rātou.

Kei hea ngā hapa?

Tērā tonu ngā whakahokinga kōrero kāore anō te kaupapa kia piri tika atu ki te Māori, ā, he hapa tonu atu i reira. E ai ki te tini o te tangata he hapa tēnei o ngā mahi tae mai ki nāianeī, he whāinga wāhi hoki te whai wāhanga mai o te Māori me te hapori ki ngā whakahaere ārai i te tāmatemate o te kauri. He maha tonu ngā āhuatanga e āhei ai ngā hapori – ngā tāngata takitahi me ngā rōpū – ki roto. I whakaarahia mai te whāinga wāhi o te hapori ki te aroturukitanga a te pūtaiao, me te kī, he hapa anō i reira.

I kaha anō te kōrero a te tangata mō te pūtaiao, otirā ngā tikanga pūtaiao ka āhei hei tūāpapa mō ngā rongoā ka taea te tangotango, te tari ake, te whakapai ake hoki e ngā hapori.

Kāore i te tirohia ngā whenua e puritia ana e te tangata i tēnei wā, ā, kei te kimi ngā kaipupuru whenua i tētahi ara whakahaere i te tāmatemate o te kauri i ō rātou whenua. I puta hoki te karanga kia pai ake te paraire me te ioka tahi i te hīkoi o Te Papa Atawhai (DOC) me ngā kaunihera ā-takiwā, waihoki Biosecurity New Zealand (he wāhanga nō te Manatū Ahu Matua) me ētahi atu hoa kōkiri.

Ētahi atu āhuatanga i whakaarahia, he tangi kia whakawhānuitia tō tātou māramatanga ki te ao ngahere kauri me ngā take o te tāmatemate nei, kia aro nui ki te whakahau i ngā ture (otirā ko ngā tūranga horoi me tino ū te tangata ki ngā ture horoi), me mātaki ki ngā akoranga i te ao whānui, kia kaha ake te hunga hautū i ngā tikanga me te aronga, ā, kia kaha ake hoki te whātoro atu ki te pārongo pāpori.

He aha ngā mahi kikokiko me mahi i te tuatahi ki ō whakaaro?

Tētahi ia whakaaro i hokia e ngā kaikōrero kia tautokona horotia ngā kaipupuru whenua, me ētahi huarahi hei whai.

He maha tonu i kī, me kapi tonu atu ngā ara katoa, me waihanga hōu katoa aua ara me te whakaputa hōtaka mō te whakatuwhera anō. Ko te katinga rawatanga o ngā ngahere kauri katoa – kia kitea rā anō he rongoā e te ao pūtaiao – te huarahi anake e tika ana, e āraia ai te korehāhātanga o te kauri. Me huri ngā whakaaro, me whakamahī i te pūtaiao pāpori kia karanga ki 'ngā ngākau me ngā hinengaro' o te tangata, me whakatū ara hīkoi ngāherehere tuarua, tuatoru hoki. Tērā anō hoki ētahi i whakakāhore rawa i te kapinga o ngā ngahere kauri, me te kī, he mea hira te whakawātea i ngā whāinga wāhi ātaahua ki te whakangahau, ki te hīkoi i waenga i ngā ngahere kauri.

Ki ētahi tāngata kia nui atu ngā mōhiotanga i ia tomokanga ngahere, i ia kēti ki ngā ara, kia nui atu ngā akoranga mō ngā tāngata katoa, kia kaha ake hoki te aukati i ngā kīrearea, ā, me pērā ēra mea katoa ināianei. I te hiahiatia he kawa mō ngā tāpapa tupu, otirā ko ā te hapori ngā mea hira, tae atu ki ētahi huarahi ngāwari kē atu te utu mō ngā taiepa ārai karerehe konihi. He mea tino nui te hanga punanga, rāhui rānei mō ngā takiwā e noho hauora ana kāore he tāmatemate i tēnei wā, otirā, he mea tino nui tēnei ki ērā tāngata e pupuru whenua ana, e whakahaere whenua ana i tēnei wā. Ka paiheretia pea te ngākau o te tangata ki te ngahere pea, mā te tautoko i ngā kaiako kura ā-taiao, me te haumi moni ki ngā rauemi me ngā kaupapa whakaako, pēnei i ngā hīkoi mā Te Papa Atawhai e ārahi mā ngā whenua kauri (ki ētahi ka wareware ēnei rākau i te tangata, mehemea he roa rawa te katinga o ngā ara).

E hāngai tonu ana te matapae me ngā whāinga mō te whakahaere i te tāmatemate i te kauri?

He maha tonu i whakaaro he hāngai tonu te kitenga, engari me whakatikatika ngā whāinga me ngā huaputa, kia kore ai e “hāngengangenga”, engari kia tika, kia hāngai, kia taea te whakawā.

Ki te kore te raru o te tāmatemate o te kauri e rongoātia, ka pēhea te pānga ki tō hapori?

He rite tonu ngā whakaaro huri noa i ngā takiwā katoa – he aituā nui, he rarunga nui, he mātauranga kua memeha ki te pō, he pōkaikaha - kāpātau i Aotearoa anake, engari i te ao. Tērā anō hoki te reo whakaae hei matua te kauri mō te ngahere, mō te tini a Tāne, hei pou whirinaki hoki mō mgā momo tupu, karerehe maha.

HE AHA INĀIANEI?

Tēnei mātou te whakamahi nei i tā mātou i rongō ai i ēnei huihuinga, huringa huarahi tuatahi hei tuhi tikanga hōu mō te whakahaere i te tāmātemate o te kauri. Ka noho tēnei hei tūāpapa mō te Mahere o te Motu mō te Ārai Kīrearea, kia tū ko ngā tino tikanga pai rawa hei ārai i te tāmātemate o te kauri.

E rua atu anō ngā huringa i te motu ki te kōrerorero i tēnei tau, ki te whakarongo ki ā koutou kōrero. Hei te Ākuhata ka kimi whakaaro mātou mō:

- te pukapuka tikanga hōu
 - ngā āhuetanga, ki a koe, me whakauru ki te Mahere o te Motu mō te Ārai Kīrearea, tae atu ki ngā whiringa tiketike tonu mō te tari whakahaere māna te Mahere e whakatinana
 - te horanga o te Mahere o te Motu mō te Ārai Kīrearea.
-

